

10
D. ISIDORI

Præsulis Hispalensis

Laudatio

Recitata pridie Nonas Aprilis

Anno a Christo Nato MDCCCVIII

AB EMMANUELE MATHEOS

DEL ANGEL

In Isidoriano Collegio.



Hispani:

In Majori Typographia.

D. D. JOANNI ANTONIO DE URIZAR

Sacerdoti,

In utroque jure Doctori Sapientissimo,

Judici Sinodali integerrimo,

A Secretis Emmi. et Exmi.

D. D. LUDOVICI DE BORBON,
*Canonico hujus almæ Metropolitanæ,
ac Patriarcalis Ecclesiæ Hispalensis*

Dicant

Humillimi

Cientes



*Emmanuel Gonzalez
Diaz.*

*Andreas Vila
Zapata.*

ORATIO.

*Si quid ingenii præstantius in arduis cui-
libet natura donasset, tanta mihi, Isidori
laudum præconi futuro, dicendi facultas con-
tingeret, ut nec major, nec uberior esse, aut
excogitari posse videatur: quamobrem et vo-
bis injucunda minus, et tanto Præsule dig-
na magis existeret Oratio. Sed illud, huma-
nisimi viri, infantiae meæ condonandum
existimate; qui non sponte mea, sed eorum,
quibus nefas esset non obtemperare, vi coac-
tus, hunc locum contingere sum ausus, quo
nihil, nisi perfectum ingenio, elaboratum in-
dustria afferri oportere non ignorem.*

*Quid ergo de puerulo, adhuc humanio-
rum litterarum studia percurrente, liceat
sperare, quod dignum sit Isidoro nostro,
dignum hujus auctoritate loci, dignum de-
nique vestris auribus et sapientia? At vero,
cum et Isidorus omnium sæculorum me-
moriam dignissimus, sacrarum infularum or-*

*namentum insigne, Hispaniæ nostræ decus
immortale, Catholicæ Ecclesiæ Doctor egre-
gius, Sanctitatis exemplum, sapientiæ lu-
men, nobis sit hodierna die, si minus debitis
laudibus exornandus, certe justis ac neces-
sariis officiis prosequendus: et eximia ves-
tra erga caelestes omnes pietas et reve-
rentia multis in rebus cognita sæpe sit atque
perspecta: non est magnopere pertimescen-
dum, ne aut in causa tali, quæ oblata
est, oratio nobis deesse possit, aut vos oratio-
nis nostræ fractæ quidem ac debilitatæ affec-
ti tædio minus intentos animos atque ad
audiendum alacres habeatis. Agite ergo, Vi-
ri clarissimi, humanitatem qua præstatis,
ut soletis, ostendite; et me Isidori res præcla-
rè gestas percipientem, eumque perfectissi-
mum veri Præsulis exemplar exhibentem,
favore et benevolentia vestra prosequimini.*

*Ego vero, Viri clarissimi, Apostoli doc-
trina nixus sic existimo: in eo qui Ecclesiæ
Dei præfuturus sit, has duas res inesse debe-
re, et summam vitæ sanctitatem, et rerum*

divinarum scientiam omnibus numeris absolutam. Nam et populus illi commissus ad æternæ beatitudinis præmia virtutis Christianæ semita ducendus est, in quo ducis exemplum valet plurimum; et hostium tela Catholicæ religionis veritatem oppugnantium sanæ doctrinæ viribus retundenda, quod nisi scientia singulari sit præditus, nequeat efficere.

Quæ cum ita sint, quantus utraque in re fuisse putandus est Isidorus, qui parentes sortitus pietate ac Religione conspicuos, Leandrum et Fulgentium, fratres, doctores habuit, et litteris et virtute præstantissimos? Quantus esse debuit, quem portenta non vulgaria, magnum futurum, ab auspiciatissimis ipsius incunabulis divinitus prænuntiarunt? Quantus denique fuisse credendus est, quem non casus ut sæpe fit, non partium studia, non gratia potentum, pretio aut ambitione quæsita, præensantem, nihilque non molientem; sed ejus spectata virtus singulari Dei providentia ad Hispalensis Ecclesiæ

regimen difficillimis Christianæ Reipublicæ temporibus, obsistentem et præ animi demissione repugnantem, evexit?

At Isidorus quidem ut primum pastoralis sollicitudini fuit admotus, non ignorans quantum sibi oneris esset injunctum, et se populo tanquam exemplar ad imitandum esse propositum, ut melius muneri satisfaceret, omnium virtutum exercitium, quas semper coluerat, adhibendum existimavit. Hinc et fides ejus solidissima, et spes firmissima, et charitas in Deum et homines, flagrantissima, hinc ejus animi demissio profundissima; hinc ejus in rebus agendis prudentia singularis; hinc in pauperes, et ceteros calamitate presos largitas profundissima; hinc in periculis pro Dei honore, et hominum salute adeundis excelsi animi magnitudo; hinc reliquæ, ne singula persequar, virtutes omnes quasi ruptis molibus, exundare, atque in omnium conspectum prodire cæperunt.

Quis enim non mirabitur in Isidoro nostro illam animi, terrena cuncta despicientis,

magnitudinem, cum illum videret, Præsi-
lem omnibus suffragiis renuntiatum, urgen-
te populo, rege Recaredo jubente, non nisi vi
raptum, et in Episcopali sede convocatum,
piis eorum desideriis adquievisse?

Quis non mirabitur studium ejus vehe-
mens et inflammatum, quo perditorum Chris-
tianorum corruptis moribus obviam ire Ec-
clesiæ disciplinam in pristinum splendorem
restituere conlapsam pietatem sarcire, et eos
qui veræ fidei castra reliquerant, reducere
constituit? Qua quidem in re non minus ejus
prudencia quam studium spectanda est. In
his rebus omnibus et gravibus, et difficillibus
ita versatus est ut nec augeri mala sineret
indulgendo, nec nimis urgendo suorum ab
se voluntatem abalienaret. Itaque nec vi co-
gebat, nec minis intentis, simulatam animi
conversionem inutilem extorquebat, sed om-
nes blande compellatos, veritatis viribus per-
suasos, suos reddere satagebat. O viri pruden-
tiam singularem! O veri Præsulis et paren-
tem se amantissimum et pastorem vigilantis-

simum exhibentis, exemplar perfectissimum!
Nam de ejus in pauperes largitate, in
eos, qui calamitate aliqua premebantur, be-
nignitate, in ceteros munificencia, quid plu-
ribus adtinere explicare, cum neminem vestrum
latere arbitror, quod alienæ opis indigentes
suis quotidie sumtibus aluerit? quod aut vi-
duis aut pupillis opem tulerit? quot carceribus
detentos missos fecerit? quot sive virorum, seu
virginum monasteria aut erexerit aut repa-
ravit? Quotdemum sacras ædes omni supe-
llectilium genere ornatas reddiderit?

Dies me deficeret, Viri clarissimi, si om-
nia Isidori nostri cum largitatis documenta,
tum ceterarum virtutum omnium, quibus ma-
xime floruit, vellem recensere. Sed modus ad-
hibendus est: neque enim omnia persequi, sed
summas res attingere ab orationis exordio
constitui: et aliqua de tanti Præsulis doctri-
na, quod secundo loco proposueram, deliban-
da sunt.

At in Isidori doctrina commemoranda
ita versabor, ut non omnia quæ in ejus com-

mendationem adduci possunt, in medium proferenda, atque exponenda vobis, existimem: aliter enim oratio nostra nunquam esset finem habitura.

Isidorus ergo iis artibus, quæ ad humanitatem pertinent, quibusque puerilis ætas informari solet, adprime instructus, nobilissimæ illi scientiæ se devovit, quæ recte ratiocinandi, atque disserendi rationem docet, quæ mores format; quæ intimam rei cujusque naturam perscrutatur; in eaque tantum excelluit, ut omnia philosophorum placita cognita haberet atque perspecta. Nec ab arithmetica, geometria, musicæ, ceteris etiam studiis matheseos, fuit alienus. Vix namque omnium disciplinarum orbis, quod græci uno vocabulo dicunt encyclopedian, celerrime percipiendi falcutati sufficiebat.

Sed cum Isidorus noster singulari Dei providentia ad inajora vocaretur; ad Ecclesiam Dei regendam, ad hominum salutem procurandam, ad hæreticorum pertinaciam infringendam: ei disciplinæ impensius in-

cumbendum fuit, quæ ceteras disciplinas omnes sicut dignitate præcellit, sit longe præstat utilitate: respicit enim supremi numinis naturam et attributa.

Quam ut melius adsequeretur cum hæbraicæ, tum græcæ præsidium linguarum, quas intime calluit, adhibendum sibi constituit. Satis enim sibi persuasum erat, Thæologica pertractantem, si quidem veri Theologi laudem consecetur, iis omnino litteris carere non posse. Sunt enim Theologi quidam non re, sed nomine: ii omnes, qui cum adversario versionem, quam dicunt vulgatam, respuente, et ad textus primigenios provocante, congregari non possunt; et si quando, quod sæpe fit, in Sacris codicibus explanandis ad linguas illis recurrendum sit, quibus primitus divina ipsa volumina sunt conscripta, alienis oculis videre cogantur. Quod quantum Theologo sit, indecorum, quisque perviderit.

Isidorus igitur Theologiam adgressus, non tricis et quisquiliis, non quæstiunculis distractus inutilibus, sed solidam semper eru-

ditionem sectatus, cum in hac divina scientia
progressum fecit, ut omnes, jure doctrinam
ejus et sapientiam demirarentur.

Testes hujus rei produco et Leonem quar-
tum, et Bonifacium octavum, locupletissimos:
quorum ille inter Ecclesiæ Doctores retulit
Isidorum; hunc hæsitantem videbitis, utrum
Isidorus Ambrosio sit præponendus, an qua-
tuor Ecclesiæ Doctoribus quintus adjicien-
dus. Testantur etiam duo sacra, ab eo habi-
ta, comitia, quibus præfuit, et Hispalense se-
cundum, et quartum Toletanum, celeberrima.
Testantur omnes demum, aut qui a vitiorum
cæno ejus monitis et hortationibus ad melio-
rem frugem sunt traducti, aut qui a veræ fi-
dei tramite deviantes, mitissimis ejus at gra-
vissimis argumentis sunt reducti.

Habetis igitur Isidorum, Viri clarissimi,
si non debitis laudibus exornatum, ingenii
mei, quod scitis quam sit exiguum, tenuitate
vetante, certe quoad potui, et qua per tempus
licuit, brevitate laudatum. Habetis veri Præ-
sulis, quemque requirit Apostolus, et summa

*vitæ sanctitate, et scientia rerum non solum
divinarum, quod satis erat singulari, sed hu-
manarum etiam omnium omnimoda eruditio-
ne præstantis, exemplar perfectissimum.*

*Reliquum est, quo orationi meæ finem
imponam, ut vobis, Viri clarissimi, qui me
dicentem tam patienter sustinuistis, et
universo amplissimo vestro ordini gratias
agam cumulatissimas ob vestra præclara et
multa et maxima in me, in Conlegas meos, in
hanc domum omni tempore conlata benefi-
cia; quibus nunc pro vestra in litteras et litte-
ratos animi propensione cumulum maximum
addidistis, decernentes vestro munificentissi-
mo senatus consulto, ut in hac domo, ubi Ec-
clesiastici adolescentes sub vestris auspiciis
educantur, cujusque primæ fundamenta Sanc-
tissimus idemque doctissimus Isidorus jecisse
creditur, scientiarum, quæ docentur numerus
augeatur: quo fiet, ut quæ nulli aut domesti-
ca disciplina aut morum probitate cedit, sa-
pientia et doctrina ceteras omnes antecellat.*

DIXI.